

## **FOTO KLUB "TUZLA" GODIŠNJA KLUPSKA IZLOŽBA FOTOGRAFIJE**

Općenito, odlika je ovoga trenutka suvremenosti i likovnosti u svijetu, daje vizualizacija najznačajniji vid i trend čovjekovog susretanja sa okruženjem, prva stavka njegovoga imenovanja i najznačajniji elemenat komunikacije sa njim. Fotografija, film, televizija, internet, fotoaparati, kamera i satelit, učinili su svijet očiglednim, svačijem pogledu dostupnim, globalnim selom koje svako može vidjeti s kraja na kraj. Kako pokazuje aktivnost Asocijacije za umjetničku fotografiju Bosne i Hercegovine sa sjedištem u Tuzli, tako i aktivnost Foto kluba Tuzla dokazuje punu svijest o tom trendu i daje mu izvanredan i pun doprinos, što je lijepo vidljivo u ovoj postavci klupske izložbe fotografije koja biva čovjekovim aoristom jednog vremena.

Dakako, očigledna je neujednačenost u dosezima i postignućima, jer, Foto klub Tuzla ima članstvo u rasponu od dječjeg uzrasta do zrelog trećeg doba. U tome i jeste ljepota klupskih izložbenih postavki, koje se kreću u rasponu od prosječnih fotografija za dokumentaciju, do inventivno-kreativnih uradaka koji operiraju visokim vrijednostima fotografskog likovnog jezika i doista dosežu klasu koju imenujemo kao kreativna ili umjetnička fotografija. Dakle, ovdje se niko ne takmiči, ovdje samo svi žele pokazati to što mogu napraviti. Situacija je realna upravo jer je očigledna u rasponu od prvih pokušaja do uradaka doajena tuzlanske fotografije Riste Milićevića, jer u tom nizu imamo uratke Roberta Andrejaša, Ozrena Božanovića, Alije Kambara, Mirsada Hadžiefendića, Zrinke Andrejaš, Alena Dobrića, Mustafe Terzića, Irene Hujdur, Nade Mukić i drugih autora, ali u svakom slučaju ljudi s nepogrješivim okom na viziru i sigurnim prstom na okidaču fotoaparata, iznimno vještima u izboru motiva i određivanju svjetlosnih vrijednosti i kompozicionih elemenata na površini i u dubini svojih snimaka i fotografija.

Posebnu radost ovoga trenutka klupskoga rada predstavljaju mladi zainteresirani fotografijom. Osim što postižu izvrsne rezultate, u foto klubu Tuzla imaju od koga učiti.

Ako napravimo samo ovlašnu usporedbu s izložbenim postavkama fotografije koje smo u novije vrijeme imali priliku vidjeti u Tuzli kao klupske postavke foto klubova iz Zagreba i Osijeka, mirno ćemo moći zaključiti kako foto klub Tuzla, doista, u svakom pogledu ima inicijativu i ne zaostaje po svojim rezultatima, jednako u analognoj i digitalnoj fotografiji.

Čestitam.

Bosanski kulturni centar Tuzla, 21. 02. 2008.